

**Ammasumik ataatsimiinnermi oqaluuserisassat:**

**Imm. 01 Oqaluuserisassat akuersissutigineri**

**Imm. 02 Suliassat nalinginnaasut  
BDO-mit aqqissuussaaneermik misissueqqissaarinermit inernerit  
tunngavigalugit aqqissuussaakkut allannguissamut siunnersuut**

**Imm. 03 Kangaamiuni meeqqerivissap itigartitsissutigineqarsimaneranut  
naammagittaalliut**

**Imm. 04 Kommunalbestyrelsimi qinikkatut suleqqilernissamik qinnuteqaat – Henrik  
Fleischer**

**Imm. 05 Ataatsimiititaliamut ilaasortassanik sinniisussanillu nutaanik qinersineq**

Ataatsimiinneq videokonference atorlugu ingerlanneqassaaq aallartissalluni 13. juni 2019 **nal. 08.00**

Peqataasut:

***Atassut***

Anna Karen Hoffmann  
Emilie Olsen  
Karl Davidsen

***Inuit Ataqaatiguit***

Juliane Enoksen  
Axel Lund Olsen

***Partii Naleraq***

Ulrik Lyberth

***Siumut***

Malik Berthelsen  
Evelyn Frederiksen  
Ruth Heilmann  
Gideon Lyberth  
Frederik Olsen, *telefonikkut peqataavoq*  
Jakob Olsen  
Karl Lyberth  
Hans Frederik Olsen

***Nalunaaqqarlutik peqataannngitsut***

Sofie Dorthe R. Olsen

**Imm. 01 Oqaluuserisassat akuersissutigineri**

**Aalajangiineq**

Oqaluuserisassat akuersissutigineqarput.

**Imm. 02 BDO-mit aaqqissuussaannermik misissueqqissaarinnermit inernerit tunngavigalugit aaqqissuussaakkut allannguinissamut siunnersuut**

*Journalnr. 02.01.01*

Tunuliaqutaq

Maniitsup Kommunerisimasaata aamma Sisimiut Kommunerisimasaata 2009-mi januaarip aallaqqaataani Qeqqata Kommunianut kattunneqarnerisa kingorna, aaqqissuussaaneq annikitsuinnarmik naleqqusarneqarnikuuvoq. 2014-imi aggustimi ilaqutariinnut ilinniartitaanermullu pisortaanertut atorfik atorunnaarseriarlugu illoqarfinni marluusuni (Maniitsumi Sisimiunilu), pisortaanerup sulisuinut pisortatut atorfiit marluk pilersinneqarnerisigut, massakkut Sisimiuni pisortaanerup sulisuinut pisortatut atorfik Maniitsumilu ineriartortitsinermi pisortatut atorfik, aaqqissuussaaneq kingullermik allanngortinneqarpoq.

Kommunalbestyrelsi 2017-imi oktobarip 26-ani aalajangerpoq, aaqqissuussaannerup isikkua misissorneqassasoq, kissaatigalugulu aaqqissuussaannermik misissueqqissaarisooqassasoq. Tassunga atatillugu 2018-imi oktobarip 25-ani Kommunalbestyrelsimi aalajangiunneqarpoq, aaqqissuussaannermik misissueqqissaarinissamut avataanit siunnersortitut BDO toqqarneqassasoq.

Maleruagassatigut tunngavigisaq

Kommunit aqunneqarnerat pillugu Inatsisartut inatsisaat nr. 29, 17. november 2017-imeersoq § 1. Kommunip susasaqarfiini kommunalbestyrelse aqutsisuuvoq.

Imm. 2. Kommunalbestyrelsip kommunip aqunneqarnera, taamatuttaaq borgmesterip suliassaqarfii, pillugit malittarisassat erseqqinnerusut aqutsinermut ileqqoreqqusami aalajangersassavai. Aqutsinermut ileqqoreqqusassamut taamatullu aqutsinermut ileqqoreqqusamut allannguutissatut siunnersuutit kommunalbestyrelsimit minnerpaamik ullunik 14-inik akuttussuseqartumik marloriarlugit suliarineqassapput.

Pissutsit atuuttut

2018-imi novembarimi decembarimilu aamma 2019-imi januaarimi Maniitsumi Sisimiunilu, aaqqissuussaannermut misissueqqissaaneq BDO-mi siunnersortinit ingerlanneqarpoq, tassani apersuinerit 55-it ingerlanneqarlutik. Politikerit, pisortaanerit, pisortat, immikkoortortaqarfinni aqutsisut, inuillu qitiutitat (Lokalsisu aamma Hovedsisu) apersorneqarput. Tamatuma kingorna apersuinnermit inernerit BDO-mit katersorneqarput, 2019-imi aprilimi ullormi sammisaqartitsinermut tunngaviusuusumik, Kommunalbestyrelsimullu pisortaqtigiinnullu nassiunneqartumik nalunaarusiortoqarluni.

Aaqqissuussaannerup misissuiffigeqqissaarneqarnerani paasinarsivoq, innuttaasut qanimut qitiusumik aaqqissuussisimaneq, maannakkut allaffissornikkut aaqqissuussaannerusoq Qeqqata Kommunianut nukittuffiusoq, taamaattumillu siunissami aaqqissuusseqqinnissami attatiinnarneqartariaqartoq. Tamatuma saniatigut illoqarfiit akornanni suleqatigiinnissami tunngavissaq pilersinneqareersimavoq, innuttaasunilli pitsaanerpaamik sullissinissami nukittorsarneqartariaqarluni.

Tamatuma saniatigut naliliinerup takutippaa, ullumikkut pisortaanerit marloqiusamik akisussaaffeqarnertik patsisigalugu suliassarpassuaqartut, ingerlatsinermullu tunngasunik annertuumik immikkut sammisaqarnermikkut akimmiffinngorsinnaasartut.

Ilutigalugu Qeqqata Kommuniani aqutsisoqarnikkut aaqqissuussaanera ilungersunartumik inissisimavoq, aalajangiisinaanermili piginnaatitaaffik ersarissumik agguataagaangilaq. Ilutigalugu atugarissaarnerup, tatigeqatigiinnerup kiisalu suliassat, akisussaaffiit piginnaassutsillu nukittorsarneqarnissaat immikkut sammineqarnerisigut, aaqqissuussaanermi pingaarnertut suliassap ataatsimoorullugu aaqqiivigineqarnissaa pillugu sulissutigineqaruni aamma nukittuffittut inissisimassaaq. Kiisalu piginnaatitaaffiit annertusarneqarnissaat sulissutigineqaraluarpat aamma iluaqutaassagaluarpoq.

Aaqqissuussaanermi misissueqqissaarneq aammattaaq 2019-imi pingasunngornermi apriliip 24-ani BDO-meersumit Birgitte Hoberg Sloth-imit, Kommunalbestyrelsimut pisortaqatigiinnullu ullormi sammisaqartitsinermi saqqummiunneqarpoq. Tassani eqimattakkaarluni periarfissat sorliit suliareqqinneqassanersut toqqarniarlugit eqimattakkaani eqqartorneqarlutik.

Eqimattani isumaqatigiittoqarpoq ataatsimiititaliat ataavartut tallimaniit ataatsimiititalianut ataavartunut pingasunut ikilisinneqassasut, tassungalu eqimattaq amerlanerussuteqartut aaqqissuussaanermi allannguutissatut siunnersuutitut nutaatut periarfissaq 4 toqqarpaat, tassungalu atatillugu aaqqissuusseqqinnermut siunnersuummik nutaamik pisortaqatigiit saqqummiussipput periarfissat tallimaattut, siunnersuullu taanna BDO-mit nalilersoqqissaarneqarnikuuvoq, aammalu periarfissaq 5-imut pitsaaqutit, ajoqutaasinnaasut, aammalu immikkut tunngavigisat pillugit ilanngussami atuarneqarsinnaalluni.

#### Atuilluartuunissakkut kingunerisinnaasai

Aaqqissuussaanertut ingerlaavartumik allanngortiterisinnaaneq atuilluartuuneruvoq, taamaalilluni suleqatigiinnissamut isumaqatigiissut aamma periusissiasatut pilersaarutip malitsigisaanik politikikkut anguniakkanut tulluarsarneqarluni.

#### Aningaasaqarnikkut allaffissornikkullu kingunerisinnaasai

Aaqqissuusseqqinneq ungasinnerusoq isigalugu, Qeqqata Kommunianut aaqqissuusseqqinnikkut allaffissornikkut sipaaruteqarsinnaaneq pineqassaaq, uani immikkoortortani suleqatigiinnik sulisoqarluni, taamaalilluni immikkoortuni assigiinngitsuni immikkoortortani aqutsisut ikilisinneqassallutik.

Taamaattorli pisortaanernik immikkoortortaniluunniit pisortanik nutaanik atorfinitsitsinermut aningaasaqarnikkut kinguneqassaaq, tamannalu periarfissaq sorleq toqqarneqarnera pillugu annertunerusumik paasineqarnikuunngilaq, ullormili sammisassaqartitsinermi periarfissaq 4-mik toqqaaneq aallaavigigaanni, pisortaanernik immikkut marlunnik atorfinitsitsisoqassaaq, taamaalilluni pisortaqaarfik tamakkiisoq sisamanik pisortaneqalissalluni, tamanna pisortaanernut marlunnut ukiumut aningaasartuutissanut 1,8 mio. koruunik malitseqartussaassaaq. (Pisortaanermut ataatsimut missiliorlugu 880 t.koruuniupput.)

Immikkoortortani pisortanik atorfinitsitsilluni pisortaaqatigiit siunnersuutaatiguttaaq akissarsiatigut oqimaatsuussaaq, immikkoortortani pisortanik pingasunik atorfinitsitsisoqarneratigut ukiumut 1,7 mio. koruunit missaanik naleqassamat. Uani eqqarsaataasinnaavortaaq, immikkoortut anginerusut soorlu Ilaqutarinnermut immikkoortortaq aamma Ilinniartitaanermut immikkoortortaq ataatsimoortinneqarsinnaanerit, taamaalilluni immikkoortortani pisortanik marlunnik sulisoqassalluni, tassunga ukiumut akissarsianut aningaasartuutit 1,2 mio. koruunit missaaniissapput. (Immikkoortortami pisortamut ataatsimut missiliorlugu 580. t.koruuniuvoq. )

Immikkoortortani suleqatigiikkaanik aqqissuussinerup malitsigisaanik assersuutigalugu Ilaqutariinnermut immikkoortortami immikkoortuni aqutsisut arfineq-marluk sipaarutigineqassapput, taamaalilluni ullumikkusut immikkoortuni aqutsisut quliunatik, taamaallaat immikkoortuni aqutsisut (illoqarfinni tamani) pingasuinnangussallutik, periarfissamik 4-milli toqqaanikkut, pisortaanernik nutaanik marlunnik atorfinitsitsisoqassamat akissarsiatigut oqimaatsuusaaq. Taamaattumik ilanngaattissat ilanngaatigereerlugit amerlassutsinut aningaasaqarnikkut sipaarutissat annertuallaarnaviangillat.

Kommunalbestyrelsip aalajangeereernerata kingorna, periarfissaq sorleq ingerlateqqinneqarnissaanik aalajangiineq malillugu, Qeqqata Kommuniani aqqissuusseqqinnermik misissuisussamik suleqatigiissitamik pilersitsisoqarnissaa pingaaruteqarpoq. Taamaaliornikkut sulisunik nuutsiterinissamik suliniutinilluunniit assingusuni allaffissornikkut annertunerusumik kinguneqarsinnaavoq.

### Allaffeqarfiup naliliinera

Allaffeqarfik naliliivoq, aqqissuussaannerup nalilersoqqinneqarnera peqqinnartuusoq, innuttaasunut sapinngisamik sunniuteqarnerpaamik minnerunngitsumillu politikikkut anguniakkanik sulinissaq pingaaruteqarmat. Taamaattorli periarfissaq sorleq toqqaarneqassanersoq allaffeqarfiup pissanngatigaa, aammattaq aqqissuussaannermut sunniuteqarsinnaamat, allaffeqarfimmik allannortiterinermi sapinngisamik suleqataasut akuutinneqarnissaat, pingaaruteqartutut tikkuarlugu.

### **Innersuussut**

Allaffeqarfiup Kommunalbestyrelsimi eqqartoqassanngorlugu innersuussutigaa, innersuussutigalugulu,

1. aqqiissuusseqqinnermut suleriaqqinnissamik periarfissaq sorleq ingerlanneqassanersoq aammalu aqqissuussaannermik pitsanngorsaatissami siunnersuusiortoqassasoq:

- a) Periarfissaq 1: Pingasunik pisortaaneqarluni: Kommunimi pisortaaneq, Nutaaliornissamat pisortaaneq aammalu Atugarissaannermut pisortaaneq.
- b) Periarfissaq 2: Marlunnik pisortaaneqarluni – Kommunimi pisortaaneq, Ilaqutariinnermut/atugarissaannermut, Ilinniartitaanermut kiisalu ataatsimoorussamik allatseqarfimmik, Innuttaasunillu Sullissivimmik akisussaasoq, kiisalu Kommunimi pisortaanerup tullia, Inuutissarsiutinut, Teknikkikkimut Avatangiisinullu kiisalu pisortap sulisuinut, Nutaaliornissamat suliniutinullu allaffeqarfimmik akisussaaffilik.
- c) Periarfissaq 3: Maannakkutut aqqissuussaannerup pigiinnerneqarnera
- d) Periarfissaq 4: pisortaanernik nutaanik marlunnik atorfinitsitsisoqassasoq, tassalu ilaqutariinnermut pisortaaneq ataaseq aamma ilinniartitaanermut pisortaaneq ataaseq. Tamanna isumaqarpoq pisortaanerit sisamangussasut.
- e) Periarfissaq 5: pisortaanerit marluk paariinnarlugit, immikkoortortanili pingasuusuni immikkoortortani pisortanik atorfinitsitsisoqarluni pisortaaqatigiit siunnersuutaat.

2. ataatsimiititaliat ataavartut qanoq amerlatiginissaanik siunnersuusiortoqassasoq, aammalu ataatsimiititaliat ataavartut suunissaanik siunnersuusiortoqassasoq:

- a) Aalisarnermut, Piniarnermut Nunaqarfinnullu ataatsimiititaliaq aamma Inuussutissarsiutinut Takornariaqarnermullu ataatsimiititaliaq atorunnaarsinneqassasut.
- I. Aalisarnermut, Piniarnermut Nunaqarfinnullu ataatsimiititaliap akisussaaffii, Teknikkeqarnermut, Aatsitassarsiornermut Avatangiisinullu ataatsimiititaliamut nuunneqassasut.
  - II. Peqqinnerulersitsinissamut tunngasoq Ilinniartitaanermut, Peqqinnermut, Sunngiffimmi sammisanut Kultureqarnermullu ataatsimiititaliamit, Ilaqutariinnermut Isumaginninnermullu ataatsimiititaliamut nuunneqassasoq.
  - III. Inuutissarsiutit, Majoriaq suliffeqarnerlu (Inuussutissarsiutinut Takornariaqarnermullu ataatsimiititaliamit), Ilinniartitaanermut, Peqqinnermut, Sunngiffimmi sammisanut Kultureqarnermullu ataatsimiititaliamut nuunneqassasut
  - IV. Inuussutissarsiutinut Takornariaqarnermullu ataatsimiititaliaq il.il. Aningaasaqarnermut ataatsimiititaliap ataaniilissasoq.
- b) Ataatsimiititaliat ilusilersugaanerat atuuttoq paariinnerneqassasoq

3. qaninnerusumut ungasinnerusumullu aningaasaqarnikkut kingunissat 2019-imut missingersuutinik ukionullu missiliuuteqarfiussasut siullermeerinermi ilanngunneqassasut.

### **Aalajangiineq**

Anna Karen Hoffmann attuumassuteqarnini pissutigalugu immikkoortumi peqataanngilaq.

Suleqatigiinniit Imm.2-imut imatut innersuussissaagut oqaaseqarlutalu.

Aaqqissuusaanitta misissorneqarnerani sulisut oqariartuutiminnik tusaaneqartutut misigisimanissaat pingaaruteqartutut isumaqarfigaarput aammalu anguniakkatta tamakkiisumik piffissaqarfigineqarlutillu sukkanerusumik sulissutigineqartarnissaat pingaartillutigu. Taamatuttaaq allaffissornikkut pisariillisaanissaq eqqarsaatigalugu politikikkut ataatsimiititaliatta marlunnik ikileneqarnissaat aamma innersuussutigivarput.

Naluneqanngitsutut inunnik isumaginninnermi meeqqallu atugaat eqqarsaatigalugit annertuumik unammilligassaqarlutalu ajornartorsiuteqarpugut. Taamaattumik kissaatigivarput ilaqutariinnermut immikkoortorta qarfimmi tamakkiisumik ukkatarinnitumik kivitsisussamillu immikkut pisortaqaqalernissarput taassumalu Majoriami suliffissarsiortut ilanngullugit akisussaaffigissavai.

Suleqatigiinniit innersuussutigineqartut 1-imi tamaasa itigartitsissutigalugit, nutaamik imatut innersuussuteqarpugut.

Pingasunik pisortaaneqalissasugut imatut isikkoqartumik.

1. Pisortaaneq, pisortaanerunerme saniatigut teknik-imut aningaasaqarnermullu pisortaajutigisoq.
2. Nutaaliornissamut ilinniartitaanermullu pisortaq. (Innovation & uddannelse)
3. Atugarissaarnermut suliffissaqartitsiniarnermullu pisortaq. (Velfæd & arbejdsmarked)

Taakkualu tamanut ammasumik qinnuteqartitsinikkut inuttassarsiunneqassapput.

Immikkoortorta qarfiit ataatsimiititaliallu imminnut ataqatigiinnissaat anguniarlugit

innersuussutigineqartut 2-imi itigartillutigit, nutaatut imatut isikkoqalernissaat innersuussutigaarput.

1. Aningaasaqarnermut inuussutissarsiornermullu ataatsimiititaliaq. Takornariaqarneq ilanngullugu.
2. Teknikimut Avatangiisinullu ataatsimiititaliaq. Nunaqarfiit, aatsitassarsiorneq, aalisarneq piniarnerlu ilanngullugit.
3. Ilinniartitaanermut kultureqarnermullu ataatsimiititaliaq. Sunngiffimmi sammisassat ilanngullugit.
4. Atugarissaarnermut suliffissaqartitsiniarnermullu ataatsimiititaliaq. Pinaveersaartitsineq peqqinnerlu ilanngullugit.

Taamatuttaaq pilersarusiornermut pisortap teknik-eqarfiup ataanut inissinneqarnissaa innersuussutigaarput.

Taasineq:

Akuersisut: 11 EO, JE, ALO, UL, MB, EF, RH, GL, FO, HFO, JO

Akerliusut: 1 KL

Taaseqataanningsut: 1 KD

Innersuussutit akuersissitigineqarput.

Karl Lyberth aalajangiinermut akkerliuvoq isumaqatigiisummi isumaqatigiissutit atuutiinnarissai kissaatigigamigit. aamma akuerisinnaangilaa politikkerit atorfilittanut naalaannarneri.

## **Ilanngussat**

1. Aaqqissuussaannerup misissoqqissaarneqarnera jan. 2019
2. Aaqqissuussaannerup misissoqqissaaneqarnera periarfissaq 5 pisortaaqatigiit siunnersuutaat
3. Ullormut sammisanik eqikkaaneq
4. Qeqqata Kommuniata aaqqissuussaanaera atuuttusoq
5. Kommuneqarfik Sermersooq aaqqissuussaanaerata ilusilersorneqarnera
6. Qeqertalik Kommune aaqqissuussaanaerata ilusilersorneqarnera
7. Kommune Kujalleq aaqqissuussaanaerata ilusilersorneqarnera
8. Avannaata Kommunua aaqqissuussaanaerata ilusilersorneqarnera

**Imm. 03      Kangaamiuni meeqqerivissap itigartitsissutigineqarsimaneranut  
naammagittaalliut**

*Journalnr. 23.02.06*

Tunuliaqutaq

Innuttaasunit 105-init atsiorneqartumik Kangaamiuni meeqqerivimmuq nutaamut itigartitsineq pillugu Kangaamiuni innuttaasut 2019-imi maajip 24-ani naammagittaalliummik nassiussaqaqput. Tassani ilaatigut allassimapput:

"Paasinarsimmat Kangaamiuni meeqqerivimmik nutaamik isumallualernerigaluarput kommunalbestyrelsemit akisugalugu amerlanerussuteqartunit itigartinneqarsimasoq matumuuna atuisutut nunaqqataasutullu naammagittaalliummik ingerlatitsivugut. Qeqqata kommuuniata nittartagaani 2018-2022 pilersaarusiormi periusissat saqqummiunnerani anguniakkani qupperneq 34-mi Kangaamiut pillugu ima allassimasoqarpoq: ”Meeqqerivik atuarfimmuq ilanngutsinniarpaput, atuarfiullu illutai pioreersut nutarsarlugit”

Taamaattorli tassa atuarfik kisiat suliarineqassasoq kommunalbestyrelsimit akuersissutigineqarsimavoq taamaammatt Kangaamiormiusugut ataani atsiorpugut nutaamik meeqqerivimmik ilumut pisaarusunnerput uppersarlugu. Massakkummi meeqqeriviusoq 1964-mi atulersoq ullutsinnut naleqqukkunnaarlunnartutut isigigatsigu."

Maleruagassatigut tunngavigisaq

Meeqqanut suli atualinngitsunut perorsaanikkut inerikkiartuutaasumik ulluunerani neqeroorutit pillugit Inatsisartut inatsisissaattut siunnersuut nr. 16, 3. decembari 2012-meersoq.

Pissutsit atuuttut

2019-imi apriilip 25-ani kommunalbestyrelsip ataatsimiinnermini suliaq suliarivaa, tassani siunnersuut 2, 16,5 mio. koruuninik aningaasaqartaqartoq toqqarneqarluni.

Atuilluartuunissakkut kingunerisinnaasai

Innuttaasut tusarneqartutut misigisimanerat aammalu atsiornernik katersisimaneq kommunalbestyrelsimit akissuteqarfigineqarnissaa atuilluartuuneruvoq.

Aningaasaqarnikkut allaffissornikkullu kingunerisinnaasai

Kommunalbestyrelsip aalajangiineratigut, Kangaamiuni atuarfimmik nutarsaanissamut 16,5 mio. koruunit immikkoortinneqarput.

2017-imi aallartittumik kommunip illuutaanik nutarsaanissamut ukiumut immikkut 15 mio. koruunit immikkoortinneqarnikuupput, tassannga illunut allanut tunngatillugu meeqqerivik nutarsarneqassanersoq nalilersorneqartussaalluni.

Allaffeqarfiup naliliinera

Allaffeqarfiup nalilerpaa, Kangaamiuni innuttaasunut ataatsimiititaliaq allagaqartariaqartoq pingaarnertut imalerlugu,

1. Atuarfik 16,5 mio. koruuninut nutarsarneqassasoq
2. Illuutinik nutarsaanermut ukiumut 15 mio. koruunit immikkut immikkoortitaasut tunngavigalugit meeqqerivik nutarsarneqassanersoq teknikkeqarnermut avatangiisinullu immikkoortortap nalilersussagaa

3. Atuarfiup immikkoortuani atuarfik meeqqerivillu inissaqarsimanngitsut, taamattumik atuarfimmi meeqqerivik akulerutsinneqarsinnaanera periarfissaqarsimanngitsooq ilutigitillugulu eqqarsaataaqqaaareersutut meeqqerivik matuneqassasoq

Allaffeqarfiup innersuussutaa

Ilinniartitaanermut, Peqqinnermut, Sunngiffimmi sammisanut Kultureqarnermullu ataatsimiititaliamut innersuussutigineqarpoq, innuttaasut saaffiginnissutaat eqqartorneqassasoq

Ilinniartitaanermut, Peqqinnermut, Sunngiffimmi sammisanut Kultureqarnermullu ataatsimiititaliap suliamik suliarinninnera

Ataatsimiititalaq 3. juni 2019 ataatsimiinnermini aalajangiivoq kommunalbestyrelsip allakkiq aalajangiiffigissagaa.

**Innersuussut**

Ilinniartitaanermut, Peqqinnermut, Sunngiffimmi sammisanut Kultureqarnermullu ataatsimiititaliamut Kommunalbestyrelsimut innersuussutigivaa,

- kommunalbestyrelsip allakkiq naammagittaalliut aalajangiiffigissagaa

**Aalajangiineq**

Teknikkerinit uku misissugassanngortinniarpaat: meeqqerivik nutaaq imaluunniit aserfallatsaalineqarnissaa imaluunniit atuarfik meeqqerivillu ataatsimoortinneqalersinnaanersut. Atassummiit piumasarineqarpoq sukkanerpaamik misissuineq ingerlanneqassasoq.

**Ilanngussat**

1. Kangaamiuni meeqqerivissap itigartitsissutigineqarsimaneranut naammagittaalliut
2. apriilip 25-ani immikkoortumik kommunalbestyrelsip suliarinninnera
3. SANAARTORTITSISUP SIUNNERSUUTAA Kangaamiuni atuarfiup nutarterneqarnera

**Imm. 04 Kommunalbestyrelsimi qinikkatut suleqqilernissamik qinnuteqaat – Henrik  
Fleischer**

*Journalnr. 01.01.03*

Tunuliaqutaq

Kommunalbestyrelsimut 1. maj 2017-imit 30. april 2021-imit qinigaaffimmi Henrik Fleischer Partii Naleraq tunuliaqutaralugu qinigaanikuuvoq. Qinigaaffiik Inatsisartuni sulinini pissutigalugu kommunalbestyrelsimut qinikkatut, piffissamik killiligaanngitsumik sulinngiffeqarallannginnis-saminik Henrik Fleischer qinnuteqarpoq akuerineqarlunilu maajip 26-iani 2017.

Juuni arfineq aappaani 2019 Henrik Fleischer qinnuteqarpoq juulip aallaqqaataaniit 2019 kommunalbestyrelsimi suleqqilernissaminik.

Maleruagassatigut tunngavissat

Kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit Inatsisartut inatsisaat nr. 27, 28. november 2016-imeersoq § 54 ima allassimavoq:

*Imm. 1 Ilaasorta qinigaaffiup iluani kommunalbestyrelsimi tunuarniarluni qinnuteqarpat, qinnuteqaat taamaattoq qanoq kinguneqartinneqassanersoq kommunalbestyrelsip aalajangissavaa.  
Imm. 2. Qinnuteqaat ilaasortap peqqissusaata qanoq issusianik tunngavilersorneqarpat, sulianik assigisaanilluunniit pingaaruteqartunik pissuteqarpat, pineqartup ilaasortaanissaanut ajornarnerulersitsippat, qinnuteqaat naliginnaasumik akuerineqassaaq.*

Pissutsit atuuttut

Kommunalbestyrelsimi ilaasortatut qinigaasoq sulinngiffeqareerluni sulileqqinnissaanut sukkulluunniit utersinnaammatt, qinnuteqaat akuerineqartariaqarpoq.

Henrik Fleischer-ip kommunalbestyrelsimi qinikkatut sulileqqinnerani, Partii Naleraq-miit sinniissuusoq Ulrik Lyberth 30. juni 2019 ilaasortaajunnaassaaq.

**Innersuussut**

Kommunimi pisortaanerup kommunalbestyrelsimut tullinnguuttut akuerisassanngorlugit innersuussutigai:

1. Kommunalbestyrelsimi Henrik Fleischer kommunalbestyrelsimi qinikkatut juulip aallaqqaataaniit 2019 sulileqqissasoq
2. Ulrik Lyberth kommunalbestyrelsimi qinikkatut juunip 30-aniit 2019 suliunnaassasoq

**Aalajangiineq**

Innersuussutit akuersissutigineqarput.

**Ilanngussaq**

1. Henrik Fleischer-ip kommunalbestyrelsimi qinikkatut suleqqilernissaminut qinnuteqaataa ulloqartoq 7. juni 2019

**Imm. 05      Ataatsimiititaliamut ilaasortassanik sinniisussanillu nutaanik qinersineq**

*Journal nr. 01.01.03*

Tunuliaqutaq

2019-imi juulip aallaqqaataani Henrik Fleischer-ip kommunalbestyrelsimit sulileqqilerneranut atatillugu, suleqatigiit Siumut, Inuit Ataqatigiit Partii Nalerarlu ataatsimiititaliamut il.il. ilaasortassanik sinniisussanillu kommunalbestyrelsimut akuerisassanngortitsilluni innersuussinissaanik qinnuigineqarpoq.

Maleruagassatigut tunngavissat

Kommunit aqunneqarnerat pillugu Inatsisartut inatsisaanni nr. 29, 17. november 2017-meersumi § ”38-mi allassimavoq *Piffissap qinigaaffiup ingerlanerani ataatsimiititaliami taamaaqataaniluunniit ilaasorta q tunuarpat kommunalbestyrelsimilu suleqatigiinnit aalajangersimasunit qinerneqarsimappat inissaq inueruttoq suleqatigiinnit taakkunangga inuttalerneqassaaq.*”

Pissutsit atuuttut

Tullinguuttunut **ilaasortamik nutaamik** qinersisoqassaaq:

1. Ilaqutariinnermut Isumaginninnermullu Ataatsimiititaliaq
2. Ilinniartitaanermut, Peqqinnermut, Sunngiffimmi sammisanut Kultureqarnermullu Ataatsimiititaliaq
3. Qeqqata Kommuniani qinersinermik siulersuisut
4. Arctic Circle Business

Tullinguuttumi **sinniisussamik nutaamik** qinersisoqassaaq:

1. Teknikkeqarnermut Aatsitassarsiornermut Avatangiisinullu Ataatsimiititaliaq

**Innersuussut**

Kommunalbestyrelsimit akuersisassanngorlugu, Suleqatigiit Siumut, Inuit Ataqatigiit Partii Nalerarlu tullinguuttutigit toqqaanissamut innersuussinissaanik qinnuigineqarpoq,

Tullinguuttunut **ilaasortamik nutaamik** qinersisoqassaaq:

1. Ilaqutariinnermut Isumaginninnermullu Ataatsimiititaliaq
2. Ilinniartitaanermut, Peqqinnermut, Sunngiffimmi sammisanut Kultureqarnermullu Ataatsimiititaliaq
3. Qeqqata Kommuniani qinersinermik siulersuisut
4. Arctic Circle Business

Tullinguuttunut **sinniisussamik nutaamik** qinersisoqassaaq:

1. Teknikkeqarnermut Aatsitassarsiornermut Avatangiisinullu ataatsimiititaliaq

**Aalajangiineq**

Ulrik Lyberth-ip ilaasortaaffii henrik Fleischer-imiit ilaasortaaffigineqalissapput.

**Ilanngussat**

1. Ataatsimiititaliat allattorsimaffiat

